

بعد نص الليل

ديوان شعر بالعامية

أحمد صفوت

دار
المنشور
للنشر والتوزيع

بعد نص الليل (ديوان شعر)

المؤلف : أحمد صفوت

الطبعة الأولى : يناير ٢٠١٩

التسيق الداخلي : رفعت حسن سيد

دار العلوم للنشر والتوزيع

ص.ب : ٢٠٢ محمد فريد ١١٥١٨

هاتف : ٠١٠٦١١٦٠٩٨٨-٠١١٤٤٧٦٤٠٠٠

الموقع الإلكتروني : www.dareloloom.com

البريد الإلكتروني : daralaloom@Hotmail.com

صفحات التواصل الاجتماعي :

Facebook.com/Dareloloom

Twitter : @Dareloloom

جميع الحقوق محفوظة ...

رقم الإيداع : ٢٠١٨/١٥٩٢١

الترقيم الدولي : ٩٧٨-٩٧٧-٣٨٠-٥٧٤-٦

دار
العلوم
للنشر والتوزيع

إن الآراء الواردة في هذا الكتاب لا تعبر بالضرورة عن رأي دار العلوم للنشر والتوزيع

يُمنع نسخ أو استعمال أي جزء من هذا الكتاب بأية وسيلة تصويرية أو إلكترونية أو ميكانيكية بما فيه التسجيل الفوتوغرافي والتسجيل على أشرطة أو أقراص مقروءة أو بآية وسيلة نشر أخرى بما فيها حفظ المعلومات، واسترجاعها من دون إذن خطي من الناشر .

إهداء

لأبى و أمى

إهداء ليا و لكل الناس

الى مشاركانى فى الأحداث

القسم الأول

بالعامية المصرية

بداية القصة

إزاي بداية القصة
حُب و تضحية
و نهايتها فراق
من غير محاولة لوم
أو حتى ذكر عتاب
و إزاي بتهون العشرة
و سنين العمر
و الماضي و الأحلام
و إزاي في وقت الشدة
الواحد ممكن يتساب
و إزاي بنحلم ببيكره
و نعد في الحاجات
اللى لازم تتجاب
من هنا و من هناك
و في لحظة بنقلب عواجيز

و إحننا لسه شباب
إزای بعد ده کله
بنکسر بعض
و نخسر بعض
و نقفل باب
ملهوش مفتاح
و ننسی إننا
طول عمرنا
کنا زمان
اتنين أحباب
و یاما کان فيه ما بینا
شوق و تنهيدات
کلام بالساعات
و خناق علی تفاهات
دلوقتی محدش فینا
هیقدر یعیش مرتاح
أو یستحمل وداع

دلوقتی مضطربین
نشیل بعض من الحسابات
من غیر ما نسأل لیه
هو إحنا مکملناش
و ندفع علی حُبنا
ضریبة استهلاك
دلوقتی بشکی و نلوم
و عنینا غرقانة دموع
خلص الموضوع
و أكید معروف
إیه الأسباب
کتر الأسئلة
ملهوش إجابات
مشهد متعاد
عن واحد حب
و واحد ساب
و واحد لسه

جى عليه
الدور يتساب
لو دايم الحال
كان فعلاً دام
مش كل نهاية لحدوتة
لازم نقفلها بـ توتة توتة
و نقوم على طول
فيه ناس بتنام
مش مبسوطة
و بتفضل كاتمة جواها
مش راضية تقول
لو روحك عايشة مكسورة
شيلها فى برواز
ميكونش إزاز
أحسن ما تموت .

ليلة شتا

فى ليلة شتا
هربان من المطرة
نداء أخير للقطر
بيغادر المحطة
ورجلى بتسبق الريح
ركبت فى آخر لحظة
تذكرتى كانت ف كرسى
قعدت جنب واحدة
شوية ولقيتها فجأة
عمالة بتبكى بحرقة
قلت ف عقل بالى
أكيد دى دموع الفرقة
أتاريها ماسكة قلم
و عمالة تكتب فى ورقة

دى رسايل لبعض البشر؟!
 و لا دى قصة حياتها؟!
 ف سمحت لنفسى أكلها
 من غير ما أبص
 حتى فى عينها
 و سألتها " طب بتعيطى ليه " ؟
 و عياطك ده بقى لزمته إيه
 لو كنتى اتسابتى من حد زمان
 ف كلنا عادى وارد نتساب
 مش فارقة إيه اللى حصلك
 أو كانت إيه يعنى الأسباب
 فى الآخر هيا نتيجة واحدة
 معروفة تحت مسمى فراق
 ف إبدأى بقى صفحة
 كده جديدة
 خليكى قوية و عنيدة
 مش كل واحد يفارق

لازم نزعل عليه
فيه ناس متستاهلش
نسألهم مشيتوا ليه
وبكره تحيلك فرصة
ترديله الجرح
ده جرح و نص
وهتنسى خلاص
بقى وجع الفرقة
وتخرجى بقى
من "موود" الحزن
ملقتش منها رد
ولا استعنا بكلامى
سمعانى طول الوقت
وكأنى شىء خيالى
قلت فى عقل بالى
معلش أكيد معذورة
و كانت سرحانة فى صورة

ماسكاها بالمقلوب
حاولت أقرب منها
و بعنيا أعمل زروم
أشوف حطة منها يدوب
مش قادر أصدق عنيا
الشك بيكبر جوايا
دقات قلبى عمالة تزيد
الشك أتحول تأكيد
دى صورتى ليا أنا و هيا
و إيديها ماسكة فى إيديا
معقولة بجد تكون هيا
بصتلى قالتلى أنت أنانى
أتاريها أصلاً شايفانى
و قالتلى بص على المشهد
و راجعوا بالتفصيل تانى
و عموماً بقى جداً تُشكر
على كل اللى عملته عشانى

غلطان إدينى كمان فرصة
أرجع و أصلح أخطائي
إسمعى منى لآخر مرة
هتحدى ساعتها بأوجاعى
اسكت متقولش و لا كلمة
بقى ليها لازمة أو داعى
ده كلامك كله شىء مرفوض
و مالکش فى قلبى مكان موجود
أرجوك بقى تمشى و تنسانى
ردها بعياط خلانى بكيت
لا ضحكت عليكى و لا اتسلت
فيه بس ظروف غصبٍ عنى
خلتنى بعدت و قمت مشيت
أرجوك بقى اسكت متكلمش
و اتفضل أمشى و متسلمش
كان غلطى من الأول أصلاً
حبيتك و أنت متستاهلش

ربنا هيساحك و يعينى
ارتاح أنا و أنت بعيد عنى
وقتها حسيت إنى اتشليت
بالعافية يدوب أنا قمت مشيت
و وقعت من طولى ساعتها
و شوية كده فقت و حسيت
و لقيت واحد كان بيقولى
عامل إيه ؟ دلوقتى يا بيه
رديت قتلته إنى كويس
مع إنى كان شكلى بهيس
و طلبت منه شوية مية
رد عليا . حاضر عنيا
مديت أنا إيدى
كده فى جيبي
علشان أطلع أدويتى
بصلى بفضول
و سأل على طول

لو تعبان نشوف دكتور
قلته لا هو ده علاجي
و مش هعمل تانى أى كيماوى
أنا حالتى يئسوا خلاص منها
و بقيت أنا ضيف فى الدنيا دى
و فهمت خلاص إن الدنيا
عمرها ما بتدى واحد عايز
و تعبت من كلمة جايز
مش كل طموحات و أمانى
بتكون فى الآخر بيها فايز
مش هفضل طول عمرى اتعلق
و لا همسك خيط أمل دايب
أنا اسمى هيكون من بكره
مكتوب إنى فى خانة الغايب .

عادى

و هفوق م الصدمة أكون عادى
أبرد إنسان ف الدنيا دى
مش هزعل تانى و لا هفرح
و هتبقى دى نهايتى معاكى
لو وجعك دائماً فى كلامى
هيكون بقى أكثر فى سكاتى
و الأكثر هيكون فى بعادى
حواراتنا دائماً متعادة
بقى سهل نزعل بزيادة
و أهو عيب فىا
على عيب فىكى
خلانا سهل نتمادى
فاشل بقى إنى أرضيكي
و لا عايز منك اتراضى

و أهو حزن يحيب
من بعده الكبت
ده محدش فينا
بقى طايق حد
مش طایل سما
و لا طایل أرض
لا أنا عشت ملاك
و لا كنت شیطان
مش كل حوار
تشوفینی غلطان
نفسی أرجع لیا
تانی فرحان
مش كل خناقة
بعديها معلش
و ترجعي من تانی
تدینی الوش
مش هفضل عایش

أنا قد ما عشت
ساحونى إن كنت
بقيت ساكت
أصل هزعلكوا أما أتكلم
مش بس هيا اللي ارتاحت
أنا بكره هرتاح و أتعلم
و أهو بكره إيديا
تسيب إيدها
مش هرغى تانى
ولا أحكيلها
عن وجعى
و عن أى مشاكل
يبقى الموضوع
ده ملوش داعى
و محدش يلويلى دراعى
هنساها و هنسى لكلامنا
قال يعنى أنا هخرج م الجنة

فتحت عنيا بعديها
ما أنا كنت زمان عايش أعمى
أنا أسف إنى طلعت عبيط
و بقرب ليه إذا كنتى بعيد
جه الوقت علينا إن إحنا نسيب
و نطيب كل أوجعانا
ده محدش فينا قلبه سليم
و لا حد بإيده يطلعنا
م الهم اللى إحنا عايشين فيه
ملناش كده يد فى الترتيب
و لا حاجة نقولها ترجعنا
مش بس كلام بنقوله بالليل
و الصبح بنرجع فى كلامنا
ما هو كل شىء فى نهايته نصيب
هنودع اللى يودعنا .

لسان حالها

لسان حالها كان يقول

خليك دائماً جنبى

فى كل لحظة و كل يوم

و بلاش شخط و نظر

و خناق ملوش لزوم

و بلاش تشوف نفسك

نسخة من سي السيد

و عايش فى دوره على طول

أنت مش سي السيد

و لا صورة منه بالكربون

كفاية غرور و تمثيل

على شىء أصلاً مش فيك

و عمره ما كان موجود

خليك حنين و طيب

و إدينى الاهتمام

شاركنى فى أى كلام
حسسنى بالأمان
و كفاية كده حرمان
إحكيلى ع الأسرار
بالحب مش إجبار
شاركنى فى التفاصيل
خليك راجل أصيل
واهتم دائماً بيا
وحسسنى بالحنية
ده أقل حق ليا
منتش بتمن عليا
واحضنى حضن طويل
الحضن مش بالذراع
ده ممكن كلمة تتقال
تخلّى "موودى" جميل
أنا و أنت أكيد قادرين
نحل أى خلاف

أنا عايزة أحس بأنى
فى وجودى فارقة معاك
و أنا عارفة إنك بتغير
و الغيرة دى ليها تأثير
فى الغالب بيكون كبير
حتى لو كان تمثيل
و الغيرة لو معقولة
متقللش من الرجولة
مش كل راجل شرقى
لازم يمثل يعنى
و يعيش دور البطولة .

حبّتها بزيادة

إملوا القاعة بالزغاريط

شغلوا مزيكا و أغانى

وارقصوا . . مش عيب

اخلقوا جو كبير من الفرحة

لبسوا العروسة فستان و طرحة

و ف نهاية اليوم السعيد

وصلوها لحد بيتها

و بخروها لا العين تصيبها

و متنسوش إنكوا تدعولها

زى ما أنا كنت

يومياً بدعيها

و ابقوا باركولها على لسانى

خلوها دائماً فاكرانى

و سيرتى تبقى فى كلامها

و قولولها إني ببارك
و هيا لوحدها . . هتفهمها
يجوز من بكرة هتسناني
و لو صادفت
و شافتنى قدمها
هعمل و كأني واحد تاني
و هدور وشى و أنا بمشى
لا اللحظة دى تقلب لتراجيدى
ما أنا أبسط حاجة بتوجعنى
و أنا وجعى ده
طبعى و عادى
لو مين هيكون
هنا فى مكانى
و أنا عمرى ما كرهتها
و لا يوم منها اشتكيت
ده من كتر ما حبتها
كانت لى أم و بيت

كانت لي ضهر الأب
و كل شيء يتحب
سابتلي ذكرى و جرح
سابتلي هم ثقيل
و أنا لما شفت صورتها
لقتني رحت بكيت
ع الدنيا اللي مشيت فجأة
عكس ما اتمنيت
فا مسحت دموع بكرامتي
و نسيت إن إنتي كسرتي
و على سجادتي دعيت
لنفسى إننى أنساها
و أخلق لنفسى مساحة
أفكر فى واحدة غيرها
و أكونلها أب و أخ
و أكونلها نعم الصديق
و أحاول على قد ما أقدر

أقوم بدور الحبيب
أحياناً يمكن مش هعرف
أحبها زي ما حبتها
بس الأسم هحبها
و أحاول أنى أدمنها
و هتحكىلى كل حاجة
قديمة بالتفصيل
و أنا مش هخبي عليها
حتى لو هتشيل
لازم بردو أحكيها
و على قد ما هاخذ منها
أنا بردو هديها
و أنسى اللى حبتها بزيادة
بكل طيبة و سذاجة
و أمسحها من حياتى
و أعمل لصورها " ديليت "
و حُبى ليها هيبقى ذكرى

و طلة شمسها بكره تغيب
واللى اتعلمته من القصة
إن الفراق قسمة و نصيب
و زى ما فيه إيد بتتمد
بردو أكيد
فيه إيد بتسيب .

الحكاية ببساطة

و دائماً فيه توقيت
كلنا بنمر بيه
تصحي من النوم مخنوق
مضايق مش عارف ليه
مع إنك نايم مبسوط
عمال تتضحك و سعيد
و لازم زعلك طبعاً
بيان على لبسك و شكلك
و تعبيرات وشك
و تصرفاتك و ملاحك
و الناس هتسأل تقولك
مالك دى مش عوايدك
و انت أصلاً مختار
مش عارف إيه اللى فيك
فتلاقى نفسك بتتعب

أكثر من كتر التبرير

لأن محدش مقتنع

بردك " لا . . مفيش

فتحس اليوم كئيب

و روتين بيقتل فيك

و يحيلك إحساس غريب

عايز ترجع البيت

فترجع تتخفق أكثر

و تبقى عايز تخرج

أو تتمشى ع النيل

و " الموود " محتاج إنك تسمع

أغنية قديمة لحليم

جايز ساعتها تفك

جايز تضحك و تهرج

فتلاقي نفسك بردو

زهقان راجع البيت

تعمل نسكافيه
أو قهوة بُن ثقيل
و تفضل تسأل نفسك
أنا مالى فيّا إيه ؟!
يارب أنا مش معترض
أنا بس عايز تفسير
هو أنا أصبحت مريض
شكلى محتاج لطبيب
مش عارف أصحى
مش عارف أنام
شكلى عندى
حالة اكتئاب
عايز علاج
خد برشام
يمكن تعرف
بالليل تنام
بس أنت مش مريض

و لا شخص غريب
و لا أنت انطوائي
و لا حد شايفك كئيب
و لا عندك حالة فوبيا
فى وجود البني آدمين
و لا عمرك حبيت الوحدة
و رافض تحس بالفرحة
طول عمرك عايش فى حياتك
من بره و جوه سعيد
كل الحكاية ببساطة
أنت معندكش حاجة
و طبيعى جداً فى حياتك
هتمر بحالة تغيير
و روحك تبقى محتاجة
تاخذ فترة نقاهة
تخرج من الروتين
و حياتك شفها فى مراية

علشان تعيد الترتيب
تحدد أولويات
تفلتر شوية ناس
تحدد مين أساسى
و تستبعد الكماليات
تحدد مين يستاهلك
و مين يستهلكش
مين اللى سبب راحتك
و مين سبب تعبك
مين اللى واقف جنبك
و مين عنك مبيسألش
مين اللى كان بيسأحك
و مين اللى كان بيعاتبك
و مين اللى فعلاً يهمك
و مين اللى ميهمكش
و نصيحة من أخ أكبر
متسبش نفسك كتير

على هذا الوضع الغريب
علشان هتلاقى نفسك
بتدخل حالة جنان
من غير ما تحس بالتدريج
و حاول تعاشر ناس
بتصون مش بتبيع
يوم لما تدعى ربك
يفك همك و كربك
يرددوا وراك آمين .

توأم روحك

إبتسامتك

نظرة عيونك

رسمة رموشك

خفة دمك

نبرة صوتك

غمازاتك

اللى ف خدودك

تمثيل شجاعتك

جُبْنك و خوفك

وجعك و ضعفك

خناقك مشاكلك

نزلة دموعك

غيابك حضورك

بحجة ظروفك

حزَنِكَ و غَضَبِكَ
هَدَوْنِكَ بِرُودِكَ
و سَاعَةَ هَرُوبِكَ
هَزَارِكَ رِخَامَتِكَ
حَتَّى فِ رَدُودِكَ
و لَذَّةَ شِقَاوَتِكَ
ضَحْكَةَ شِفَايِفِكَ
خَجَلِكَ كَسُوفِكَ
لَحْظَةَ مَا أَلُومُكَ
سَعَادَتِي فِي وَجُودِكَ
أَوَّلَ مَا أَشُوفُكَ
بِرَاءَةَ مَلَايِحِكَ
طِفْوَلةَ جَنُونِكَ
لَبْسِكَ شِيَاكَتِكَ
حَلَاوَةَ سَاعَادَتِكَ
كُلَّ دَوْلٍ
مَعَ قُصْرٍ طَوْلِكَ

شيء ماليني
ومالي عيني
ياريت ميكونش
لحد غيري
طموحى أكونلك
توأم روحك .

مش مستاهلة

اتغيرت زمان علشانك

إنتى عملتى إيه علشانى

استسلمتى للأناية

قلبك عمره

ما كان يوم ليّا

استحملت معاكى عصبية

و كنت واخدها

بصورة سلمية

علقتينى فى جبالك الدايبة

وانتى واثقة

إنك مش ليّا

فا كتبت اسمك

غياب فى حياتى

بعد ما إيدك

سابت إيديا

عمر الفُرقة ما هتموتنى
عمرى ما هزعل
ع اللى سبتنى
بكره الأدوار تتبدل بينا
لازم أنسى اللى ما بينا
و أرميكى من بكره
خلاص ورا ضهرى
حببتك إزاي
أصلاً من جهلى
أنا عشت معاكى
سنين فى النار
فأنا حقى أعيش
دلوقتى فى جنة
أنا قلبى خلاص
هو اللى اختار
مش حمل خناق
أو حتى مناهدة

حطيتى العقدة فى المنشار
فاكره العملية بسيطة و سهلة
كلنا جاين الدنيا عشان
نتساب و نسيب
و نعيش مع ناس
كده مش مستاهلة .

هتئساها

هتئساها

و بکره تحف و تلف

تدور علی واحده غیرها

تکمل حیاتک معاها

آخرها

هتبقی شیء ماضی

و قصه حب ماکتملتش

متستعجلش

ما هیا کمان

هتعرف ناس

و تقول ده نصیبی

أسیبه خلاص

و بردو اکید

هتبنى بعدك
حُب جديد
لا الدنيا هتخرب
ولا هتبوظ
لكن فيه حاجات
هتفضل بينكوا
مش هتموت
حيطان و بيوت
كلام و وعود
عياط و دموع
و صور كتيرة
من غير صوت
هيفضل دايماً
فى خيالكو
أحلام كتير رسمتوها
دقايق حلوة عيشتوها
أماكن كنتوا روحتوها

ده كل مكان كان ليكوا
فى ذكرى جميلة أو صورة
هتتنسى أى شىء جايز
لكن صورتها فى الآخر
هتفضل جواك محفورة.

حُب حياتى

مش عارف أبدأ
منين الكلام
أبدأ بالسهر و التفكير
و حالة الأرق اللي ملزمانى
و مخليانى مش عارف أنا
و لا من السرحان
و عدم التركيز
و النسيان و التوهان
الناس بقت تشوفنى
تقول عليّا
ده أكيد بيحب
و شكله غرقان
يا عينى كان بدرى عليه
كان لسه فى شبابه
دلوقتى العجز عليه هيبان

و لا اشتكى من الأحلام
اللى مبتفارقنيش
و معاها بعيش
فى قصص زى الأفلام
أحياناً كنت أسأل نفسى
و بقول إيه المانع يعنى
لو كنت أنا فعلاً بحبك
فتكونى كمان بتحبينى
اينعم "أزيك" و "أخبارك"
و ضحكة رقيقة
بترسم خدك
و مجرد نظرة بترضينى
متواضع و راضى بقليلى
و قناعتى دى بتقوينى
و تخلينى استحمل دايماً
و أقول ده قدرى و نصيبى
أهو اسمى موجود فى حياتك

و مسيرك بكره تحبيني
طول عمرك ساكنة جوايا
و بتمشى فى دمي و وريدى
بكتفى بوجودك قدامى
و كفاية إن تشوفك عيني
و استنى منك أى سؤال
أو أى كلام ممكن يتقال
أو كلمة فيها حنية
أو نظرة واحدة بالصدفة
لعينكى جاية فى عنيا
أو لحظة ما أجى على بالك
و تتفاجئ لما تلاقينى
بتلك فى القعدة قصادك
و فى كل وقت بصطادك
لازم ارغى معاكى و أفضفضلك
دائماً لازقلك و فى ضلك
و ساعتها يا هتزهقى منى

يا تكونى بدأتى تحبينى
ملقتش سعادتى
إلا فى حُبك
و عذابى كان
أصله فى بُعدك
دلوقتى أنا عايش فى حياتك
مش بس عايش مع صورتك
حُطِينى بس فى حساباتك
و خليكى دائماً فى حياتى
خلينى لو صورة فى أَوْضَتِكَ
يكن طول ما أنا قدامك
يتحرك قلبك ينادينى
و ساعتها هقولك كتاباتى
كلها كانت مكتوبة ليكى
بتقول إنك حب حياتى
و إزاي خليتك تحبينى .

زى الأخوات

العلاقة كانت يدوب

مجرد صداقة

كان متعود دائماً يحكلها

عن إعجابه بأى واحدة

و هيّا برضه بتحكيه

و تاخذ رأيّه و تشكيه

رغم إن عقلها كبير

و مدركة لكل شىء

و فاهمة

بس كانت بتحب

تسمع لنصايحه

و تطبقها

و مع إن فى حياتها

ناس كثير غيره

بس هو الوحيد اللى كلامه

كان مصدر ثقة بالنسبائها
مع بعض فى كل المناسبات
و شركاء فى كل الحوارات
و فاتورة فى آخر الشهر
تقطم الوسط و الضهر
من رعى ما بينهم لساعات
و يحصل ما بينهم مشاكل
ساعات تقلب خناقات
بس كانوا يحلوها بسرعة
فى هدوء و من سكات
كان ليهم قاعدة ثابتة
اسمها " اللى فات مات "
و مع الوقت
علاقة صداقة اتطورت
لعلاقة حب اتأخرت
لاتنين حبيبة كانوا دائماً
بيتعاملوا زى الأخوات

و قصة الحب اللى بدأت
نهايتها مكتش متوقعة
و غيرت كل الحسابات
لاتنين فى الكوشة قاعدين
بيوزعوا فى الابتسامات
و أهل وأصحاب متجمعين
يدعولهم أحلى الدعوات
مكتش حد متخيل
جوازة بين اتنين إخوات
دى حقيقة و ممكن تلاقيها
مش بس كلام فى روايات
م الآخر و من غير كتر كلام
لو ليك عمر سنين قدام
هتفضل فى حيرة
و مش عارف
إيه اللى مخبياه الأيام
حتى لو عشت

ضعف ما عشت

مسيرك هتوصل

لآخر صفحة

فى كتاب كبير

اسمه الحياة .

القصة مخلصتش

القصة مخلصتش

هى إتحبت

أنت محبتش

أنت أتألمت

هى محستش

و جابت أولاد

مالين بيتها

و أنت معندكش

إلا صورتها

مع كوم أوجاع

و ذكرى وداع

و موت بشویش

و كلمة

" أشوف وشك على خير "

فا ياريتك بقى لو تتعلم

ما اهى عايشة

بتضحك و تهرج

يا للى انت فاكرها بتتألم

و إياك لزمك تترجى

يجى يوم تشوفها و تسلم

أيام عايشها بتتقضا

فضفض بقى عادى و اتكلم

و مسيرك هتفوق مـ الصدمة

دى لا فاكرة هزارك

و لا ضحكك

مبقتش تجيب

حتى فى سيرتك

بس الإنجاز اللى عملته

ابنها اتسمى على اسمك

فا أكتفى باللى إنت حققته

و افكر إن ابنها مش منك

و أهو بكره هتفرح و تتجوز

و يجوز هتحب

أحسن منها

و تلاقى الوقت

عدى قوام

بقى عندك منها

أحلى عيال

و المضحك جداً فى القصة

يوم لما تلاقى

ابنها ع الباب

جى يطلب منك

إيد بتتك

و المشهد قدامك يتعاد

و إنت متساب

فى دنيا سراب

و مكمل وحدك من غيرها

و حياتك عيشتها على كدبة

الماضى صفحة و اتقفلت
مفهاش و لا ذكرى ليها حلوة
مين عارف بكره هيحصل إيه
أو حتى إيه نهاية السكة
ده محدش فينا فى الآخر
ممكن يستنتج إيه الحكمة
و هتعرف كده و انت مسافر
إيه المكتوب . . آخر الرحلة .

ست الكل

إزيك يا ست الكل
بالنسبالي أنا تمام
و زى الفل
طميننى أخبارك إيه؟!
و عارفك هتقوليلي
مش بتسأل عنى ليه
معلش حقتك عليّا
مقصر معاكى مش بايديا
و عارف إني مش بسأل
و مش باجى
سامحينى
فعلاً أنا آسف
رغم اعتذارى
ده مش كافى

بس انتی قلبك طيب
حتى و أنا مش قُريب
و لو شكلك من بره مخصمانی
فانتی من جوه مسمحانی
و فی صلاة الفجر
هتفضلی دائماً دعیالی
بس اوعی تقولی إن ابنی
اتلهی عنی و نسانی
و ده بردو معقول
انشغل عنك یا أمی
طب عقلی إزای یخونی
و أنسی اللى ربتنی
و کبرتنی و عملتنی و نورتنی
و فی حضنها کانت و خدانى
دی اللى یاما غسلت و طبخت
و من النوم یاما اتحرمت
کانت تقوم من عز نومها

تغطيني و أنا فى عز نومي
دى اللي سابت كل همومها
و كانت شائلة عنى همومى
هيا الوحيدة فى الدنيا
اللى قبلانى على عيوبى
بالذمة يعنى إزاي أنساكى
ده انتى نعمة يارب تدومى
جائز مشغول
ممكن مقصر
بس محدش هيعرف يقدر
غيرك إنتى بس انشغالى
و أنا راضى بحكمك
فقوليلى
إيه اللي ممكن يرضيكى
غير كلمة آسف سامحينى
مع دمعة نازلة من عينى
مع وردة ممسوكة فى إيدى

و لو كنت غلطت فى حساباتى

فادعيلى ربنا يهدينى

من بكره هكون دائماً جنبك

و أنا هسأل باستمرار عنك

أنا صورتى اللى الناس بتشوفها

ببساطة أساسها كان منك .

فى اسكندرية

فى اسكندرية الذكريات
ماضى عدى و عمر فات
عشت فيها أحلى سنين
أحلى أيام و أحلى أوقات
كفاية القعدة ع الكورنيش
و اللف ساعات فى الترام
و ركوب الباص أبو دورين
يشهد على قصص الغرام
فيها أحلى صيف فى الدنيا
فيها الدنيا تشتى فى ثانية
فيها المطرة نازلة سيول
ممكن تنزل فيها تعوم
فيها عرفت معنى الحب
و شوفت الضحكة

و معنى الفرحة
و شوفت إزاي الناس بتحب
بسهولة كده من أول نظرة
بخرج فيها من الروتين
و أهرب ليها من الضغوط
فيها الناس المبسوطين
عارفين إزاي
يخلوك مبسوط
فى اسكندرية برتاح
بالعافية أو بالذوق
فى اسكندرية المفتاح
لبابى و أنا مخنوق .

لحظات الوداع

ناوى تهرب و تبعد
واخذ قرارك باقتناع
و ناسى إن أصعب حاجة
هيا لحظات الوداع
الحُب ما بينكم قل
و البُعد أفضل حل
مش فارقة إزاي و ليه
و فراقكوا كان سببه إيه
مش كل واحد فارق
لازم نزعل عليه
مبقاش باليد حيلة
و لا ذكرى بينكوا جميلة
كلها صفحات م الماضى
بكره هتنساها و تتقفل

و لو قاعد مع نفسك فاضى

إياك تفكر و تفكر

عشان مبقاش فيه حاجة

بينكم تتقال أو تتذكر

و يجوز لو تيجى على بالك

راح تفتكرها و تبسم

أو ممكن تبكى على حالك

و على روحك اللى هتقسم

لو دورك تكون اليوم مجروح

بكره فيه غيرك هيتجرح

دى نهاية هتفضل متعادة

لمجروحة و مجروح فى حكاية

و سنين بتعدى و تتحسب .

Facebook

عن كلمة "typing"

و لحظة "seen"

و "active now"

و منشن ليك

عن لحظة قبول

"Friend request"

بعد ما كنت خلاص يأست

عن "comment" مكتوب

و "like" معمول

و "emotion" مبعوت

أول ما تنزل

"Post" ع الـ "wall"

عن وجع كلمة "in a relationship"

و انت بتقلب ف الـ "home page"

عن حد نفسك تعمله "add"

و حد تشيت معاه بالساعات

أول ما تصحى

و قبل ما تنام

عن مشاعر و أحاسيس

و قلب بيدق

ع السوشيال ميديا

بالذات الـ "facebook".

لما كنا

لما كُنَّا مع بعض دائماً

فى كل وقت

كنا نسهى بالساعات

و يحطفنا الوقت

لما كنا بنقضى

أحلى أيام سوا

و لو تعبتي تلاقينى

جايلك الدوا

و لو زعلتي تلاقينى جنبك

بكونلك كل واحد فى أهلك

كنت بلاقى راحتى معاكى

و أحس إن أنا لسه " أنا "

كنت فاكى

عمرى ما أعشق حد سواكى

حتى بعد مليون سنة

مهما شوفت منك عيوب
عمرى ما كنت
فى يوم بعايرك
كنت واهم نفسى أنى
عمرى ما أقابل واحدة زيك
كنت راضى بيكى كلك
و كل يوم كنت أقولك
أحضننى حضن دافى
بالنسبالى حضنك كافى
بتوحشنى و انتى معايا
و أموت لما أبقى مش معاكى
من بعديكى شلت الهم
و جرحى كان بينزف دم
و على روحى مبقتش عارف أتلّم
حياتى بقت ملخبطة
و كل حاجة ملخبطة
بس باين كنت أهبل

لما افكرت انك هتفضلى

فيا دايماً متشعبطة

عارف إنى مش مثالى

و لا شايف إن مفيش منى اتنين

بالعكس أنا كنت معاكى عادى

مش زى الناس بين وشين

و مكنتش أبداً ليكى خاين

أو بضحك عليكى بكلمتين

باختصار أنا كنت فاكـر

أننا هنفضل لآخر العمر

سوا عايشين

و انك هتكونى بنت أصول

بتحافظ و تصون

متهونش عليها عشرة سنين

كنت فاكـر اننا روح واحدة

مش روح مقسومة لنصين .

مجرد كلمتين

أبوه خائف لما انطق
أنهى صداقة
عشت بيني فيها سنين
و ساعتها لا نعرف
نبقى إخوان
وهنقى مجرد
يدوب اصحاب
عاشين حياتهم متخاصمين
أنا اللي شايله جوه قلبي
مش مجرد كلمتين
كنت فاكركُ حُبْ شهوَر
و اتاريكى حب بقاله سنين
هتَكلم و احكي بالتفصيل
عَنْ كُلِّ حاجات

قلبي حاسسها
الصمت خلاص
بقي دمه ثقيل
آجى قدامك أنسى الكلمة
و ارجع من تانى للتفكير
و أفضل محبوس
جوه الدائرة
أنا حُبى ليكى
ملوش تفسير
شاغلة تفكيرى يومياً
الحُب يا حلوة
ملوش مواعيد
و انتى أول تجربة ليّا
الحُب ملوش
خالص معايير
كلنا فى الآخر
ليه ضحية

إزاي أنا سايب كده نفسى
متشعلق فى حُباله الدايمية
وهقاوح أحاول أوصلك
لو عمرى لسه فيه بقية .

هییجی یوم

هییجی یوم و یحصل
و طول اللیل هنسهر
و النوم من غلبه یسکر
لو رب العباد رزقنا
بجته منك و منی
تشبهك أو تشبهنی
و حیاتنا تبقى وردی
و العمر معاها یجری
و الوقت و یاها یسرقنا
و بکرة تکبر و تدعیلنا
لما نلاقى روحنا
کبرنا و عجزنا فجأة
و أخذنا بعض أنا و انتی
سبقنا فوق ع الجنة .

بيست فريند

"اهداء لشريك السفر في رحلة الحياة"

طول عمره أخ دائماً

طول عمره واقف جنبى

طول عمره بيخاف علياً

طول عمره سندی و زهري

قابلى على كل عيوبى

مشاركنى فى كل همومى

طول عمره كتفه فى كتفى

وقت الشدة و الضيقة

لا عُمره مرة يشتم

ولا تتطلع منه العيبة

و من كتر هزاره بإيده

مبقاش فيا حنة

فى جسمى لسه سليمة

لو قولتله أنا رايح فى داهيه
هيقولى ياله بينا مش فارقة
معايا فى الفرح و الحزن
فى قعدة قهوة أو خن
فى كل سفرية
أو مناسبة عائلية
و سهرة يوم الوقفة
لحد الفجرية
وقت ما محتاجه بلاقيه
و لو عوزت أفضفض
عمره ما بينفض
و يسمع كل اللى أنا عايز أحكيه
طول عمره شاهد إثبات
على كل تفاصيل حياتى
شريكى فى كل مصايى
معايا فى كل حواراتى
عاملى فيها مرتضى

و عنده كل سيديها تي

لا عمره يوم يحسدني

ولا ينق ولا يُقر عليّا

ولا حتى بيغير مني

و مش ممكن يشك فيّا

أخويا اللي بجد

بعته ربنا ليّا

ف شكراً جداً يارب

بعتلي أحسن هدية

الخلاصة . . . ببساطة

هو ده "البيست فريند" يا سادة.

مبروك

أنا همحضر فرحك و أثبتلك
إن أنا قادر أدوس ع الماضي
و أثبتلك إن الموت بعدك
بقى بالنسبالي شىء عادي
أنا جاي أشوفك قبل الموت
و أتخيل غيرك تحضنى
بضحك جوايا بعلو الصوت
و أنا بسألنى
إزاي ممكن تسمعي أشعار
مهياش مني
إزاي أنا قاعد كده ساكت
مع ناس عمالة تكلمني
و بفكر فيكى و أنا سارح
طول عمرى بعترك بنتى

و مسمعتش لنصايح من ناس
كانت عمالة تفهمنى
و أنا إيه اللى يخلينى اتفرج
على واحد جاي ياخدك مني
مضطر ان أسكت و جنازتي
منصوبة هنا قدام منى
و بإيدى بسلم لحرامي
مفتاح أحزاني و أحلامي
كان اسمى هيكون فى بطاقتك
بس إنتى همك مصلحتك
فضلتك على نفسى و راحتى
و طول عمرى عشته على راحتك
أنا جاي الليلة عشان أشوفك
أنا جاي بس عشان أقولك
أنا مش زعلان
و لا عندى هموم
ما أنا هعمل إيه

ده مفيش فى إيديا
أى حلول
مش ناوى رجوع
خلص الموضوع
و أنا زى زي كل المعازيم
و هعيش من بعدك بكره يتيم
إنسان مجروح
عاش فى جحيم
أنا جاي أباركلك وأنا ماشي
علي مسرح شك
أنا آخر كلمة هقولهاك
يا حبيبتى . . دى أكيد
مبرووووك
إزاي أنا هدخل من بابك
إذا كان الباب أصلاً مقفول .

ضحكتلى

ضحكتلى

ف ضحكتلها

مع إنى مش عارفها

و دى أول مرة أشوفها

لقت كده فى ضحكتها

ونس و حضن كبير

و أنا ناقص حضن و إيد

و لقت رجلياً سحبانى

ماشى بالاتجاه ناحيتها

قولتلها "أناخرتى ليه ؟"

أنا واقف م الصبح بدرى

بصتلى باستغراب

و قالتلى " تعرفنى "؟؟

رديت عليها " ده هزار "

أنا آسف يعنى مقصدش

لو ممكن نبقى أصحاب
ولا أحسن متعشمش!!
أنا عايز أقولك كلام
زى اللى فى الأفلام
شفتك بقيت ولهان
مش عارف
إيه اللى حصل
أكيد أنا مش تمام
وبقيت مش على بعضى
مستغربة الكلام
و مش عارفة بإيه تردى
أنا جى عشان أقولك
أنا عايزك تكونى سندی
و أكونك أهلك و بيتك
و الله أنا ارتحتلك
أو شكلى حبيتك
معلش لو قلتها

طلعت كده لوحدها
من غير ما ارتبها
فيه حاجات بتتقال كده
من غير ما نحسبها
خلينا نكمل سوا
فى حياة جميلة نعيشها
شكلى واخذنى الهوا
وراكى فى كل حنة
خدى وقتك بقى و فكرى
و ياريتك لو تفضللى
و نكمل لآخر السكة .

على غير العادة

طبيعتها و هيّا زعلانة
على غير العادة مش زنانة
و لو جيت أسالها فيكى حاجة
مبخدش منها أى إجابة
و من كلمة هزار بيها أنكشها
ممكن تقلبها لحناقة
ممكن تتهور تتغابا
ببساطة دى طفلة من جوة
تلاقيها بتضحك و تهزر
لو يومى قضيته معاها
و بتزعل منى و تكشر
لو قاعدة بطولها متسابة
فيه حاجات بالنسبالها كبيرة
مع إنى بشوفها دى تفاهة .

خلينا مكملين

خلينا مكملين
مهما حصل ما بينا
و مهما اتخانقنا
بلاش نبعد
و بلاش فكرة
ننهى حياتنا
عكس ما إحنا بدأنا
ده إحنا والله عشرة
قائمة بقالها سنين
فا خلينا مكملين
حتى و إحنا متخانقين
خلينا نتحدى أى ظروف
و نواجه أى مشاكل
و نديم ما بينا المعروف

خلينا مكملين
لحد ما نكبر
و سنانا تقع تتكسر
و نكون من بره عواجيز
و من جوه فى سن العشرين
خلينا مكملين
لو بينا مشاكل الكون
نخطها دائماً على جنب
و نخاف أكثر على بعض
و أنا واثق أننا قادرين
و بلاش نوم زعلانين
خلينا متصالحين
القلوب من جوه بتتغير
و لو لونها اتحول لاسود
مش سهل يرجع أبيض
ده اللي بينام مكسور
عمره ما بيصحى سليم

و بفضل فاكِر القديم
و شائِل من الجديد
أو يَمكِن لما ينام
مِرْضاش من النوم يقوم
و ساعتها هتندم أكيد
على كل لحظة عدت
معشتش فيها سعيد
و عَيشَت حبيبك حزين .

البنت

دائماً قول لحبيبتك
مفیش زيك كثير
و مُستحيل فى مرة
يكون ليكى أى بديل
أوعى تمل منها
أو تعتبرها روتين
مهما تعبت منها
أو مهما انطفئت
و قرفت من حياتك
و بالحنقة حسيت
مكانها دائماً فى قلبك
أكيد هيفضل محجوز
وقت ما أنت تحب
و ساعة ما هيا تعوز

وقت ما تكون محتاجة
تدور عليك تلاقيك
البت لو محتاجة
بتتطمئن بمسكة إيد
مش لازم كل خناقة
تبعد عنها و تغيب
البت جداً حساسة
و مشاعرها لغز كبير
لو زعلت خدها ف حضنك
ده الحضن ليه تأثير
و أسألها قبل سؤالها
أو خمن يعنى مالها
و مش لازم ترغى كثير
أو تدخل فى التفاصيل
البت أصلاً خوافة
و من جواها شفافة
ممكن بكلمة تلين

هتعيش على طول فى راحة
لو خليتها مرتاحة
متبصش تحت رجلك
دايماً بص لبعدين
و خليك دايماً أمانها
إياك فى يوم تجرحها
امدح و اشكر فى جمالها
و حقق كل أحلامها
لو كنت بتحبها
حبها فعلاً بضمير
لأن الفكرة ببساطة
مضمونها فى التقدير .

لسه بتحن

لسه بتحن لماضيها
لسه بتقلب فى صورها
و بتفضل تسرح فى عنيتها
و متابع كل أخبارها
كنت أقرب شخص زمان ليها
و فى بيرك يا ما شلت أسرارها
دلوقتى هيا مع غيرك
دور على غيرها تعرفها
و مشاعر الحب وفرها
لواحدة تانية تقدرها .

صُدفة

بس يا سيدى
أول ما شافتنى هناك صُدفة
هاتك يا ضحك و هزار
إزيك يابنى . . . عامل إيه؟
طمنى عليك . . إيه الأخبار
مخطفى كده ليه
أنا عايش أهو
و الدنيا تمام
طب أقولك ايه
ودينا مكان كده نقعد فيه
بس اوعى تكون رايح مشوار
و أهى ركبت ورا
ركبت أنا قدام
و كلام فى السكة يجز كلام

و الدنيا زحام
كان بينا زمان
فيه استلطف
اتحول فجأة ما بينا خلاف
و أنا لسه بخاف
من كتر ما قلبى
من الناس شاف
و وصلنا قعدنا جوّه كافيه
و قالتلى احكىلى بقى
عامل إيه؟؟
بصيت فى عنيتها بقت سارح
و كأنى مودعها إمبراح
سألتنى مالك سرحت فى إيه
قتلتها أبداً مش سرحان
شكلى كده مرهق أو تعبّان
قالتلى فُكْ بلاش فصلان

كان كل كلامها قلباه لهزار
قالتلى خش فى المضمون
ندهت ساعتها ع الجرسون
و طلبت قهوة ليا
و طلبت ليها ليمون
و فضلت ساكت مش بنطق
ده لأن الحب أصله سكوت
حسيت سكوتى ده قلة ذوق
بس طبعا عارفانى . . و شايغانى
طفل عمره ما بيكبر
ساعات هادى
و ساعات مجنون
و ساعات بكون
كده رايق . . و بقلب بسرعة مضايق
و ساعات بغرق فى بحر سكوت
و بتفهم دايماً أنا عايز إيه

من غير ما بنطق كلمة و أقول
خيبة و خبتي بتبان على طول
قلتلها سيبيك يا ستى منى
و احكيلى بقى شوية عنك
إحنا برد لسه أصحاب
و العشرة ما بينا مش هتهون
من يوم ما أخذنا سوا للقرار
علاقتنا خلصت باحترام
من غير ما نلف
و لا حتى ندور
و هنزعل ليه
و مفيش لزعلنا سبب مفهوم
دى مجرد قاعدة دردشة بينا
مش تخطيط تانى لرجوع
و لا تقديم لأى حلول
و أنا جيت دلوقت هنا معاكى

علشان حسيتك وحشاني
فى الآخر هنقوم و هنمشى
هتروحي لحالك
و أنا لخالى
و أهو ده كده فرق المرة دى
علشان حبيتى من بعدى
و حبيت أنا غيرك من بعدك
بصيت فى عنيتها
مليانة دموع
ف بسرعة غيرت الموضوع
و بصيت فى ساعتى
و قلت يدوب
كده نلحق إذا كنا هنقوم
الوقت بسرعة كان يفوت
و أهى صدفة خير
عن ألف ميعاد

هنسلم و هنمشى فى هدوء
و هتفضل فيه فى حياتنا حاجات
سؤال و علامة استفهام
مش هرجع أقلب فى اللى فات
و لا أعلق نفسى بشىء اتساب
و هحاول أعيش أجمل أيام
مش هفضل أعيش
علشان فى الآخر
بس أموت .

القصة خلصت

عن بنت حبت

و عينها دابت

و ياما سهرت

و سمعت و سكتت

فى قلبها شالت

و دمعة نزلت

و وردة دبلت

و حيرة زادت

أيدها ضمت

و أيده سابت

روحها طلعت

من كتر ما بتهاود

بجد تعبت

و عمالة تسامح

و قبلت و رجعت

بعد إما اتخانت

شكلها حبه

أكثر م اللازم

و برضه فضلت

تكابر و تعاند

هيا بتتعصب

مع واحد اصلاً

طبعه بارد

جابت آخرها

من كتر ما شافت

عاشت حياتها

عمالة تحاول

تغير فيه

قال يعنى طيب

عبيط و ساذج

قلبها مش فاهم
إنها مش ليه
و القصة خلصت
يوم لما اتسابت
لا منها عاشت
ولا منها ماتت .

القسم الثانى

بالمختصر المفيد

الجمال الحقيقي
مش "ميك أب" و لا روج
و ضوافر و رموش
و عدسات على كل لون
الجمال الحقيقي
هو اللي دائماً جوه
مستخبي مبنشوفوش
الجمال الحقيقي
لو لقيته
متسيبوش .

فيه ناس بتعيش و تموت
و هما مش عارفين
إيه الحكمة من الأحداث
اللي حصلت فى حياتهم
و فيه ناس بتكتشف ده
بعد سنين كتير
عشان كده متحاولش

تعرف إيه الحكمة
من حاجة ربنا كاتبها
سواء شر أو خير
أكيد ربنا عارف
ف احمده على كل شىء .

لو كنتى محبتينش
و محاولتين تحبينى
فأنا مش زعلان منك
إنك مشيتى و سبتينى
كفاية إنك أثبتلى
إنى قادر بردو أحب
و إن مش كل حب
لازم يطلع حقيقى .

الحب زى الشمس
فى كل نهار جميل
الحب زى القمر

فى السما كل ليل
الحب زى البحر
فيه ميه مبتنقص
فيه موج يقل و موج بيوطا
و موج بيعلا و موج يزید
الحب مبيخلص
الحب مبيتنسش
الحب اللى بجد
هو اللى دائماً يعيش .

متعاتبش حد
مش مهتم بیک
لأنک لو عاتبته
و اهتم فعلاً بیک
هيبقى مش من قلبه
ده مجرد مجاملة لیک .

مفیش واحدة بتتخدع
أو بیضحك علیها
دی بتعدی بمزاجها
عشان الحب عامیها .

قبل ما تدورع الحب
دور علی شیء اسمه الراحة
و تأنی کویس و خد وقتك
و اختار علی مهلك بالراحة .

لما تحب یجد
لازم تعود نفسك
علی وجع الفراق
عشان لما یجى وقته
متلاقیش نفسك مشتاق
و بلاش تحط حد فی عنیک
لأنه فی الغالب هیعمیک
و مش هیبکی علیک

و لو دورت عليه
أكيد مش هتلاقيه .

فيه ناس غلاوتهم
عندك بتقل
و ناس غلاوتهم
كل يوم بتزيد
وناس بتعرف
تبسطك و تفرحك
و ناس بتخلق منك
إنسان كئيب
وناس مهما كابرت
و عافرت
غلاوتهم جوه قلبك
انتتهت من زمن بعيد .

عن ناس كانوا
رقم واحد فى حياتنا
ننام على صوتهم
و نصحى على كلامهم
و فى الآخر بنطلع
آخر اهتمامتهم .

هجرب مشوفكيش
يوم واتنين
يكن فى غيابك
اصحى من النوم
ألاقى نفسى مبجبكيش
و لو إنى واثق فى الحالتين
حُبك هيفضل شاغل تفكيرى
و لازق فى ضلى مبيسبنيش .

لما انت حزين
بتضحك ليه ؟

بضحك عشان أفرح
بضحك عشان أهرب
بضحك عشان أنسى
بضحك عشان مبكيش
بضحك عشان أدارى
و مبنش حتى ضعيف
و الدمع ميقر بليش
بضحك عشان
منساش الضحك
أو بردو عشان
الضحك ميخونيش .

مش شرط نكون
متشابهين أو متفقين
ساعات الاختلاف ما بينا
بيخلق حب كبير
مكنش فى الحسبة .

لما تحس أنك مش فاهم
إيه الحكمة ف اللى بيحصلك
افتكر أن ربنا أكيد
عارف و كاتبلك قدرك
فأطمئن واستبشر خير
و مسير الحكمة فى الآخر
هتوصلك .

لو ضحكت ده مش معناه
انها قدرت فى يوم تنساه
دى بتحاول تحبى الحزن
و تحبى خوفها من الأيام
عشان متبينش ضعف
و دموعها متنزلىش
ع الفاضى و ع المليون .

اعترف لحُبك الجاى
تفاصيل حُبك اللى فات

و افكر أن الصراحة
هيا أساس العلاقة
بدل ما تعيش حياتك
من جوه ميت
و الاسم حى .

مش هتعرف تهرب من قضاك
إنت خلاص اتورطت
فاتقبل وضعك برضاك
ما أنت ياما
ع النعمة اتبطرت .

جرب تبعد عنها فترة
و استحمل نتيجة المخاطرة
عشان تقيم حجم العلاقة
و تعرف إذا كان ده حُب
و لا دى مجرد صداقة .

بتفكر فى الانتحار ؟!
طب ما إنت أصلاً متتحر
و محكوم عليك بالانتحار
من يوم ما أخذت القرار
و على فكرة مكنش بالإجبار
قرارك كان من دماغك
مش فرض عليك
من اللى حواليك
فاستحمل بقى
نتيجة الاختيار .

مفيش أحسن
من اللى تتكلم معاه
و أنت واخد راحتك
تكون مؤدب
تشتم تتعصب
تبقى هادى و بارد
أو حتى ف النجفة متشعلق

تاخذ رأيه دائماً
و تحكي له مشاكلك و تفضفض
معاك فى إي وضع
و من غيره مزاجك يتعكر .

محتاج صُدف فى حياتى
محتاج شوية مفاجآت
محتاج أسمع كلام
حلو و جميل يتقال
محتاج أشوف ناس
أخدوا ع الغياب
محتاج أغير روتين
ثابت من زمان
محتاج أرجع لماضى
محتاج لوقت فاضى
يخرجنى م الاكتئاب .

أصعب وجع
وجع الفراق
بس وجعه
مش فى الوداع
و لا فى الدمعتين
و لا فى الكلام
اللى فى ساعتها بيتقال
الوجع اختصاره فى سؤال
حبينا بعض إزاي؟
و سيبنا بعض ليه! .

مفيش أحلى
من إنك تبقى وحيد
لا تكلم حد
و لا تصاحب حد
أربع حيطان و بس
ده الجدران أحن
من ناس كتير بجد
و من عيشة ماشية بالزق .

عدينا خلاص مرحلة
إننا نفضل نحكي ونشكي
دلوقتي بقينا إحنا عباقرة
و بنعرف نكتم مشاعرنا
من غير ما ندمع و لا نبكى .

مش هتعرف قد إيه
غلاوتك في قلب أي حد
غير لما يحصل
مشاكل بينكم
وقتها هيبان فعلاً بجد
مين اللي كان
مستنيها تحصل
ومين مستعد
يفوّت ويفضل
ساعتها هتعرف
غلاوتك في قلبه
و قيمتك عنده
لازم هتوصل .

القسم الثالث

بعد نص الليل

مشهد (١)

المكان : أوضه ضلمة

قاعد لوحدى

بين أربع حيطان

ممددع السرير

من التفكير حيران

دخان سجايرى

مالى أوضتى

بيحرق فى صدرى

من كتر النيكوتين و القطران

و أُمى تصحى

من النوم

تقولى مالك يابنى

فيك إيه؟؟

حساك كتيب

و مهموم

شكلك شايل

تلال هموم
أقولها مفيش
أنا بس قرفان
متقلقيش عليا
أنا شوية و هبقى تمام
نامى انتى
يا ست الكل
أنا لسه قاعد
شوية سهران
أما الزمان : فكان بعد نص الليل
مش فاكر بالظبط
الساعة كام
مش هتفرق
يعنى الأرقام
قاعد مش عارف أنا
بفكر فى أيام زمان
ما أنا عمرى ما آمنت
بحاجة اسمها النسيان

و أنا لسه فاكر
شكل صورتك
لسه فاكر
لون عينيكي
نفس تكشيرتك
و خوفك
لسه برضه طبع فيكي
لسه متلخبط كأني
إن حاجة تايهة مني
لسه فاكرك
غصب عني
لسه فاكر كل مشهد
لسه فاكر كل ذكرى
كل تفصيلة في حياتنا
كأنها لسه
جاية بكرة
لسه فاكر
كل موقف

كنت شايقة
إنى غلطان
لسة فاكر
لحظات الطيش
و لحظات الجنان
لسة فاكر لما كنت
ببقى دائماً
عليكى غيران
مش بس من كلامك
مع صحابك الولاد
ده حتى من هزارك
مع البنات كمان
لسه فاكر
قفلة تليفونك
لسه فاكر
كل ردودك
لسة فاكر
هدوءك برودك

و وقت ما كنت
أحتاجك و أعوزك
للأسف كان
غصب عني
أو باين له
كان ضعف مني
أنى أخاف
دائماً عليكى
و أفضل شارى
للى باعيتنى
كنتى طول
عمرك ذكية
و بتاكلينى بالكلام
كنت فاكرك
شايفانى دائماً
ليكى فارس الأحلام
كنا برغم كل مشاكلنا
و خلافاتنا و الخناقات

بفضل هادى
و أبقى عادى
و اعدى بمزاجى
فى أغلب الأوقات
كنت بساحك
مهما تغلظى
حتى و انتى بتستعبطى
ما أنا لو كنت أعرف
إن هيجى يوم
أحس فيه بالندم
و أبكى ع اللى فات
مكنتش ساحت
و لا كنت اتساهلت
و لا عدت من سكات
خلتني فى حُبك
زى الشحات
اللى ييشحت الاهتمام
و بطلع منك بالعافية

نظرة الحب
والخوف والحنان
عمرك ما حسيتي بيّا
وسبتيني ماشى
فى دنيا صعبة
كل يوم بتهد فيّا
و كل اللي أخذته منك
مجرد ذكرى بتجمعنا
و أماكن شاركتنا فرحتنا
و شالت عننا وجعنا
و أغنية كانت ما بينا
لازم كل يوم نسمعها
نهايتنا كانت معروفة
لفراق مكتوبلنا
و حضن مكش هيسعنا
كنت حاطط أمل
على حاجة ملهاش ثمن
و نفسى يرجع الزمن

يمكن أعرف إيه العمل
وأنا مش هعاتب فيكى
و أفضل أتكلم أو أحكى
فيه حاجات كتير ما بينا
كل أما أفتكرها بيكى
أنا بس طالب منك
تدينى فرصة أعيش
و افتكرى إن أنا حبيتك
رغم إنك محبتنيش
طول عمرى
مبشوفش غيرك
و انتى مبتشوفنيش
و سبتينى راكب قطر
واقف ميمشيش
ما فيه ناس بتفضل توعد
و فى الآخر ما بتوفيش .

مشهد (٢)

كذاب لو قلت إني ناسيكي
و أنا طول الوقت عايش بيكي
و بفكر دائماً و بضمن
ما أنا نفسي جداً أطمئن
أو حد يسلملى عليكي
شوفتيني إزاي لسه بحبك
و العشق لسه فى عينيا
مش معنى كده إني أرجعلك
أو إيدك تمسك فى إيديا
ضيعت سنيني ع الفاضى
من كتر التفكير فى الماضى
أنا عمرى ما كنت أبداً جانى
بالعكس أنا طول عمرى ضحية
لو سهل عليكي أنا بعادى
ف بعاذك كده صعب عليا
بدعيلك دائماً فى صلاتي

و ربنا أعلم بالنية
دلوقتي كلامي ملهوش داعي
عارفك في الآخر مش جاية
و الصورة اللي رسمتها ليكي
مكنتش أبداً حقيقية
معرفش أنا ليه اختارتك انتي
إشمعني حبيبتك بالذات
و أنا مش م الرجالة اللي بتنسى
حُبها لبنات تانية لبنات
دلوقتي عرفت إن أنا غلطان
مش هقعد أفكر كل ما أقوم
و لا هفضل أفكر قبل ما أنام
و أنا هدعي ربنا يرزقني
نعمة كبيرة اسمها نسيان .

مشهد (٣)

عدت يّاً سنين كتار
نفس المكان : أوضه ضلمة
قاعد لوحدى
بين أربع حيطان
ممدد ع السرير
من التفكير حيران
دخان سجايرى
مالى أوضتى
بيحرق فى صدرى
من كتر النيكوتين و القطران
و أمى تصحى من النوم
تقولى مالك يابنى
فيك إيه؟؟
شكلك متغير

مش عوايدك يعنى

بس المرادى

شيفاك فرحان

فاضحك و أقولها

إدعيلى يا أمى

إدعيلى و نامى انتى

أنا لسه قاعد

شوية سهران

أما الزمان : نفس الزمان

بعد نص الليل

مش فاكر برضه

الساعة كام

مش هتفرق

يعنى الأرقام

قاعد مش عارف أنا

بس فرق المرادى
مش تفكير فى أيام زمان
تفكير فى واقع عايشه الآن
فى واحدة تانية حبتنى
و ادتنى حقى من الاهتمام
ونستنى اللى ملتى بالآحزان
بعد ما ربنا رزقنى
نعمة اسمها النسيان .

مشهد (٤)

دلوقت خلاص
عائش مبسوط
و جراحى خلاص
كلها خفت
أنا كنت خلاص
داخل ع الموت
الحمد لله
صفحة اتقفلت
و فتحت صفحة
أجمل منها
للبنات الثانية اللى لقيتها
و أهى واحدة راحت
جت غيرها
و الحمد لله
أحسن منها
كانت أول مرة

تُحب مجد
و مجد أنا بردو حبيتها
مش بس عشان حُبها لِيَا
دى أَطهر بنت
قلبي عرفها
فى القلب الأبيض و النية
ف أخذت قرارى
أدخل بيتها
و أطلب إيديها
و أنا لسه فاكر ملاحها
و الفرحة ناطقة من عينها
و الأهل يباركوا و يهنوا
و أنا ماسك إيدها
بلبسها بإيديّ الشبكة و الدبلة
و زغرورة بتقتحم المشهد
و الناس حوالينا
قاعدة بتشهد
على قصة حب بتتحول

على فرحة هتدوم و تطول
و المأذون قاعد بيسجل
و أنا قاعد بفركُ مستعجل
مش قادر أتلم على بعضى
معرفش ده خوف
و لا دى لخرة
عايش أحاسيس بتلخبطنى
و أهى ليلة العمر بتعدى
مكتوبلى تكونى
إنتى حبيبتى
مش بس واحدة تعوضنى
عن حُبى للبنات اللى سابتنى
و إن كان لأبد
إن أنا أبكى
فأنا هبكى أكيد من الفرحة
فيه حاجات بتحصل فى حياتنا
بتكون كما النقط الفاصلة
و كتير م العلاقات فى أساسها

نهايتها بتكون مع ناس
مكنوش م الأول دول ناسها.

المشهد الأخير

أيام فاتت
و سنين عدت
و الدنيا أبيضت و اسودت
و فى آخر كام مكالمة زعيق
و شد و جذب
و شخط و نطر
و خلُق يضيق
و جه فى بالى
شريط أول لقاء بينا
و فرحة كانت
مالية حياتنا و أيا منا
و كل الذكريات فاتت
و عدت فى لحظة
قصاد عيني
فا نزلت منى كام دمعته
على خدى

و على جبینى
و خنقت کل أنفاسى
لعنت فى کل آیامى
و لومت ساعتها إحساسى
و روحى فضلت تتقطع
مضایق منها و بفکر
أرجع و لا أنا مش هقدر
ع الوضع ده إنى أكمل
و أنا هرفع رایتى و هسلم
مش هاجى على نفسى و أتألم
و أنا وجعى زاید و مطول
من کتر ما بحكى و بتکلم
و کلامى فى الآخر
ملوش لازمة
و مفیش و لا حل للأزمة
و خناقنا أصبح متلازمة
أحياناً مـ الوجة الزاید
بتضطر أن أهرب مـ الواقع

ف بنفض و أعمل

مش سامع

و قرارى أن أمشى

و مش راجع

ببساطة لأن مفيش فايدة

سبتها فى البيت كانت نائمة

مليانة بجرعة من الإحباط

بس المرة دى كانت زائدة

عشان الحلم اللى اتحول

فى نهاية قصتنا لسراب

صحيت من النوم

فجأة بسرعة

كانت مخنوقة و مخضوضة

حلمت بنهاية الحدوتة

و الحلم اتحول لحقيقة

دخلت بسببها فى غيبوبة

فاقت م الصدمة بعديها

و الناس ملمومة حوالها

تاخذ بايديهها تواسيها

مش قادرة تفهم

إيه حصلى

جریت علشان

تيجى تلحقنى

شايفاهم ماشيين

فى جنازتى

صليت وياهم

و دعيتلى

حطت دبلتها

على قبرى

حلفت و قالتلى

أنا هفضل

يا حبيبي محافظة

على وعدى

الدنيا متسواش

من بعدى

غلطانة و أرجوك

تسأخنى
ما خلاص يا حبيبتى
متعتدريش
لو سامع صوتى عرفنى
سامعك و عنيا
مبتشوفكيش
بدعى للموت
يحيى يخطفنى
علشان الدنيا
متلزمينيش
و أنا روى لغيرك
مش هتعيش
أنا هفضل جنبك
مش همشى
خليك بقى جنبى
و متسبنيش
مش عارفة الدنيا
هتعمل إيه

و لا عارفة إزای
و لا إمتی و فین
ده الناس بتقول
اللقا ده نصیب
ف أنا هستناک
هنا مهما تغیب
ملناش کده ید
فی الترتیب
و لا مین هیموت
و لا مین هیعیش .

الفهرس

٣	إهداء
٥	القسم الأول بالعامية المصرية
٧	بداية القصة
١١	ليلة شتاء
١٨	عادي
٢٢	لسان حالها
٢٥	حبها بزيادة
٣٠	الحكاية ببساطة
٣٦	تواء روحك
٣٩	مش مستاهلة
٤٢	هتساها
٤٥	حب حياتي
٤٩	زي الإخوات
٥٣	القصة مخلصتش
٥٧	ست الكل
٦١	في اسكندرية
٦٣	لحظات الوداع
٦٥	Facebook

٦٧	لما كنا
٧٠	مجرد كلمتين
٧٣	هبيجي يوم
٧٤	بيست فريند
٧٧	مبروك
٨٠	ضحكتلي
٨٣	على غير العادة
٨٤	خلينا مكملين
٨٧	البننت
٩٠	لسه بتحن
٩١	صدفة
٩٧	القصة خلصت
١٠٠	القسم الثاني : بالمختصر المفيد
١١٤	القسم الثالث : بعد نصف الليل
١١٥	مشهد (١)
١٢٣	مشهد (٢)
١٢٥	مشهد (٣)
١٢٨	مشهد (٤)
١٣٢	المشهد الأخير

